

आकाशवाणी

1. केंद्र नै कुदरती आपदाएं करी प्रभावित 5 राज्यें गी इक जहार 554 करोड़ रपे थवां मती दी बाद्दू केंद्रीय सहायता गी मंजूरी दिती।
2. केंद्र नै 15में माली आयोग तैहत बिहार, हरियाणा ते सिक्किम लेई ग्रांट जारी कीते।
3. ग्रामीण विकास मंत्री शिवराज सिंह चौहान होरें आखेआ जे सरकार नै ग्रामीण नागरिकें दे जीवन गी सौक्खा बनाने लेई केई क्रांतिकारी योजना शुरू कीतियां न।
4. केंद्री राज्यमंत्री डॉ. जितेंद्र सिंह होरें आखेआ जे भारत नमिं काहडें आहले खेतर च हून अगुवाह बनी गेआ ऐ।
5. भारत नै पाकिस्तान गी आतंकवाद दा कुल संसारी केंद्र करार दिंदे होई ओहदी सख्त लफ्जें च नुक्ताचीनी कीती।
6. ज्ञानेश कुमार होरें अज्ज मुख् चुनांस आयुक्त दे तौर पर कम्मकाज साम्भी लैता ऐ।

<><><><><><>

High Level Committee

गृह मंत्री अमित शाह हुंदी अध्यक्षता च उच्च सतह दी समिति नै पिछले बरे आए दे हाड़, ल्हास पस्सियां पौने ते तूफान जनेई कुदरती आपदाएं करी प्रभावित 5 राज्यें गी इक जहार 554 करोड़ रपे थवां मती दी बाद्दू केंद्री सहायता गी मंजूरी दिती ऐ। एह राशि राश्ट्रीय आपदा मोचन कोष एन.डी.आर.एफ थवां जारी कीती गई। गृह मंत्रालय मूजब आंध्र प्रदेश आस्तै 608 करोड़ रपे, नागालैंड आस्तै 170 करोड़ रपे, ओडिशा आस्तै 255 करोड़, तेलंगाना आस्तै 231 करोड़ ते त्रिपुरा आस्तै 288 करोड़ रपे थवां मती दी राशि मंजूर कीती गई ऐ। माली बरे 2024-25 दौरान केंद्र सरकार नै एस.डी.आर.एफ तैहत 27 राज्यें गी 18 जहार 322 करोड़ रपे थवां मती ते एनडीआरएफ थवां 18 राज्यें गी 4 जहार 808 करोड़ रपे थवां जारी कीते गए।

<><><><><><>

Finance-Commissions Grant

केंद्र नै 15में माली आयोग तैहत अज्ज बिहार, हरियाणा ते सिक्किम दे ग्रामीण मकामी निकाएं आस्तै माली बरे 2024-25 आस्तै अनुदान जारी कीते। बिहार गी 821 करोड़ रपे थवां मती दी एकीकृत अनुदान दी दुई किशत ते करीब 48 करोड़ रपे दी अनुदान दी पैहली किशत दा रोकेआ गेदा हिस्सा हासिल होआ ऐ। एह अनुदान लोड़चदी शर्तें गी पूरी करने आहली सारी 38 जिला पंचैतें, 530 पा

ब्लॉक पंचैतें ते 8 ज्हार थवां मते पात्र ग्राम पंचैतें आस्तै ऐ। हरियाणा च ग्रामीण मकामी निकाएं गी 202 करोड़ रुपें थवां मती अनुदान दी दुई किशत ते साइडे 7 करोड़ रुपे थवां मती दे अनुदान दी पैहली किशत दा रोकेआ गेदा हिस्सा मिलोग। पंचैती राज मंत्रालय नै आखेआ ऐ जे अनुदान 18 पात्र जिला पंचैतें, 142 पात्र बलॉक पंचैतें ते करीब 6 ज्हार 200 ग्राम पंचैतें आस्तै ऐ।

<><><><><><>

Mahakumbh

उत्तर प्रदेश सरकारें ते महाकुंभ मेला प्राधिकरण नै इ'नें अफवाहीं गी खारिज कीता ऐ जे प्रयागराज दे महाकुंभ गी इस म्हीने दी 26 तरीक थमां अग्गे बधाई दिता गेआ ऐ। प्रयागराज दे जिला मैजिस्ट्रेट रविंद्र मंडाड़ होरें आखेआ ऐ जे सोशल मीडिया पर वायरल होआ करदी एह अफवाह पूरी चाल्ली गलत ऐ। महाकुंभ दे बाकी बचे दे दिनें दरान बी लोकें दी आओजाई लेई बवस्थित ढंगगै'नें प्रबंध कीते जा करदे न। ट्रैफिक दे प्रबंधन दी दिशा च बी चेचा ध्यान दिता जा करदा ऐ तांजे लोकें गी कोई परेशानी नेईं झल्लनी पवै।

<><><><><><>

Gujrat-Budget

गुजरात विधानसभा दा बजट सत्र गांधी नगर च राज्यपाल आचार्य देवव्रत हुंदे अभिभाषण कन्नै शुरू होआ। सदन गी संबोधित करदे होई राज्यपाल होरें गरीबें, युवाएं, करसानें ते महिलाएं दे उत्थान पर ध्यान केंद्रित करियै राज्य दे विकास आस्ते सरकार दी बचनबद्धता दोहराई। राज्यपाल होरें बुनियादी ढांचे, रोजगार, आदिवासी, विकास ते कृषि सने बक्ख-बक्ख खेतरें च सरकार आसेआ कीती गेदी पैहलें पर लो पाई। उनें अक्षय उर्जा, ए.आई ते सेमीकंडक्टर जनेह उभरदे खेतरें च राज्य दी टकोहदी प्रगति दी सराहना कीती। देवव्रत होरें 2047 तगर विकसित भारत दे सुखने गी साकार करने आस्तै विकसित गुजरात दे विजन पर जोर पाया।

<><><><><><>

Raj-Budget

राजस्थान दी उपमुख्यमंत्री ते वित्त मंत्री दिया कुमारी होरें आखेआ जे सरकार राज्य दी 350 अरब डालर दी अर्थ बवस्था बनाने आस्तै प्रतिबद्ध ऐ ते पिछली बजट घोषणाएं चा 73 फीसद गी पूरा करी लैता ऐ। उनें राज्य विधानसभा च माली बरे 2025-26 आस्तै पैहला हरित बजट पेश करदे होई औंटे बरे च सवा लक्ख सरकारी औहदें ते डेढ लक्ख निजी खेतर दी नौकरिएं आस्तै भर्ती दी घोषणा कीती। उपमुख्यमंत्री होरें घोषणा कीती जे 2 लक्ख नमें घरें गी पीने आहले पानी दे कनेक्शन प्रदान करने आस्तै 400 करोड़ रुपे खर्च कीते जांगन।

<><><><><><>

Rural-Development

ग्रामीण विकास मंत्री शिवराज सिंह चौहान होरें आक्खेआ जे सरकार नै ग्रामीण नागरिकें दे जीवन गी मता आरामदायक बनाने आस्तै केंई क्रांतिकारी योजनाए शुरू कीतियां न। उने आक्खेआ जे इने योजनाएं देशै दी अर्थव्यवस्था गी नमी गति प्रदान कीती ऐ। श्री सिंह होरें नमी दिल्ली च अफ्रीकी-एशियाई ग्रामीण विकास संगठन - एएआरडीओ दे इक कार्यक्रम च आक्खेआ जे भारत एएआरडीओ दे बहुपक्षीय मंच दे माध्यम राएं ज्ञान, तकनीकी विशेषज्ञता ते नीतियें दा आदान-प्रदान करना जारी रखौंग। उने आक्खेआ जे भारत एएआरडीओ गी अपने समर्थन कन्नै ग्रामीण समुदाय गी सशक्त बनाग। इस दौरान श्री सिंह होरें महात्मा गांधी राष्ट्रीय ग्रामीण रोजगार गारंटी अधिनियम, प्रधानमंत्री ग्रामीण सड़क योजना, एक पेड़ मां के नाम अभियान ते लखपति दीदी जनेई योजनाएं पर गल्ल कीती। उने आक्खेआ जे अज्ज मुख नां छडा खाद्यान्न उत्पादन च आत्मनिर्भर ऐ सगुआं दूरे देशें दी मदद भी करा र दा ऐ। मंत्री होरें आक्केआ जे राष्ट्रीय ग्रामीण आजीविका मिशन राएं लगभग 10 करोड़ महिलाएं गी 50 हजार करोड़ सोयां मती दी माली सहायता प्रदान कीती गई ऐ। उने आक्खेआ जे प्रधानमंत्री नरेंद्र मोदी हुन्दी अगुवाई च लगभग 1 करोड़ 25 लाख महिला लखपति दीदी बनी चुकी दियां न।

<><><><><><>

Jitender Singh India

विज्ञान ते प्रौद्योगिकी मंत्री जितेंद्र सिंह होरें इक्क साक्षात्मकार च आखेआ जे देश बक्ख-बक्ख खेतरें च नेतृत्व ते अग्रणी नवाचारें दी पेशकश करियै वैश्विक मानक स्थापित करा रदा ऐ। उने आखेआ जे स्पेस डॉकिंग प्रयोग भारत दी तकनीकी प्रगति दा प्रमाण ऐ जेड़ा गगनयान, चंद्रयान-4 ते भारतीय अंतरिक्ष स्टेशन सने भविष्य दे अंतरिक्ष मिशनें दी बत पदरी करदा ऐ। श्री सिंह होरें आखेआ जे देश नै उपग्रह प्रक्षेपण दे खेतर च वैश्विक भरोसा हासल करी लैता ऐ। उने आखेआ जे भारत नै 433 विदेशी उपग्रहें गी सफलता कन्नै प्रक्षेपित कीता ऐ ते National aeronautics and space Administration-NASA सने दुनिया दी प्रमुख अंतरिक्ष एजेंसियां हून चंद्रमा दे दक्खनी ध्रुव थमां भारत दे निष्कर्ष दा इंतजार करा रदी ऐ। उने दस्सेआ जे देश नै कार्बन उत्सर्जन गी 50 फीसद तोड़ी घट्ट करने दे कन्ने 2047 तोड़ी 100 घेघावाट परमाणु उर्जा दा लक्ष्य रक्खेआ ऐ।

<><><><><><>

Jaishankar

विदेश मंत्री डाक्टर एस. जयशंकर होर जी20 मुखें दे विदेश मंत्रिणं दी बैठका च हिस्सा लैने लेई कल्लै थमां दक्खन अफ्रीका दे दौरै पर जा करदे न। उंदा एह दौरा दक्खन अफ्रीका दे अंतर्राष्ट्री सरबंधें ते सैहयोग सरबंधी मंत्री रोनॉल्ड लामोला हुंदे साद्दे उप्पर होआ करदा ऐ। जोहान्नसबर्ग च लग्गने आहली एह बैठक जी20 मुखें दे कन्नै भारत दे सरबंधें गी होर निग्गर करग। मेद ऐ जे विदेश मंत्री होर इस बैठक थमां बक्ख-बाहें किश दपक्खी बैठकां बी लाडन।

<><><><><><>

Goa Shipyard

गोवा शिपयार्ड लिमिटेड अबु धाबी च आयोजित .. 2025 प्रदर्शनी च भारत च डिजाइन ते तैयार कीते गेदे तेज गश्त करने आहले समुंद्री जहाजें ते दूर समुंद्रें च निगरानी रखने आहले जहाजें दा प्रदर्शन करा करदी ऐ। एह जहाज मेक इन इंडिया पैहले दे तैहत नौसेना च नवाचार ते आत्मनिर्भरता गी दर्शादे न। एह प्रदर्शनी रक्षा ते सुरक्षा च अंतरराष्ट्रीय सहयोग लेई इक मता महत्वै आहला मंच ऐ।

<><><><><><>

RBI-Data Aap

भारतीय रिजर्व बैंक नै आरबीआई डाटा नां कन्नै इक मोबाइल ऐप शुरू कीता ऐ जेड़ा लोके गी भारतीय अर्थ बवस्था कन्नै सरबंधित व्याक आर्थिक ते माली आंकड़े उपलब्ध करोआग। बैंक नै इक बयान च आखेआ ऐ जे एह ऐप भारतीय अर्थ बवस्था कन्नै सरबंधित डेटा दी 11 जहार थवां मती बक्ख-बक्ख श्रृंखला उपलब्ध करोआग। इस्तेमाल करने आहला डेटा डाउनलोड बी करी सकदा ऐ। ऐप राएं इस्तेमाल करने आहले अपने आले-दोआले दे 20 किलोमीटर दे खेतर च बैंकिंग सुविधाएं दी जानकारी हासिल बी करी सकडन।

<><><><><><>

Srilanka-IORA

श्रीलंका दे विदेश मंत्री होरें खेतर च शांति, स्थिरता ते सतत विकास गी बढ़ावा देने आस्तै हिंद महासागर रिम एसोसिएशन IORA दे महत्व पर लो पाई। मालदीव दे विदेश मंत्री अब्दुल्ला शाहिद हुंदे कन्नै इक संवाददाता सम्मेलन च उनें श्रीलंका गी खेतरिय सहयोग च मालदीव दे समर्थन दी सराहना कीती। इस दौरान अब्दुल्ला होरें श्रीलंका दे विदेश मंत्री हुंदे कन्नै होई दी व्यापक गल्लबात दा ब्यौरा दित्ता। श्रीलंका IORA दी अध्यक्षता करा रदा ऐ ते भारत इस बरे दे अखीरै तगर अध्यक्षता संभालने आहला ऐ।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 23 फरवरी गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 119मीं किशत होग। कार्यक्रम च शामिल करने लेई लोक अपने बचार ते सुझाह 21 तरीक तगर टोल फ्री नंबर 1800-11-7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री

हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग।

<><><><><><>

India Pak terrorists

भारत नै पाकिस्तान गी आतंकवाद दा कुल संसारी केंद्र करार दिंदे होई ओहदी सख्त लफ्जें च नुख्ताचीनी कीती ऐ। संयुक्त राष्ट्र च भारत दे स्थाई प्रतिनिधि पर्वतनेनी हरीष होरें इसी इक मंदें भागें आहली गल्ल दस्सेआ जे इस्लामाबाद आतंकवाद कन्नै लड़ने च सब्भनें शा अग्गे ऐ पर आपूं आतंकवाद दी धुरी बने दा ऐ ते आतंकवादिएं गी सुरक्षित आसरमे उपलब्ध करांदा ऐ। संयुक्त राष्ट्र सुरक्षा परिषद च उनें आखेआ जे पाकिस्तान 20 कोला मते संयुक्त राष्ट्र दी सूचि च दर्ज आतंकवादी संगठनें गी पनाह देआ करदा ऐ ते बन्ने पार आतंकवाद गी समर्थन दिंदा ऐ। पर्वतनेनी हरीष होरें पाकिस्तान दे उप प्रधानमंत्री इशाक डार हुंदी टिप्पणी पर बी अपनी प्रतिक्रिया दिती ते आखेआ जे पाकिस्तान नै जम्मू-कश्मीर दे कई हिस्सें पर नजैज कब्ता करी रक्खे दा ऐ। उनें आखेआ जे जम्मू-कश्मीर च लोकतंत्र जींदा ऐ ते हाल च होए दे चुनाएं च लोकें दा बधी चढ़िये एहदे च हिस्सा लैना सबूत ऐ। उनें आखेआ जे झूठा ते गलत प्रचार करिये पाकिस्तान जमीनी सच्चाई गी नेई बदली सकदा।

<><><><><><>

CM-Tourism

जम्मू-कश्मीर इक बारी परतिये सैलानिएं ते रास-पूंजी लाने आहलें लेई इक मन पसिंद थाहर बनदा जा करदा ऐ ते खरी मती निगतरी च लोक इत्थे सैलसफा लेई आवा करदे न ते रास-पूंजी लाने लेई बी खुशी-खुशी इत्थे विजन कुसै डर-त्राह दे आवै करदे न। एह गल्ल केंद्र शासित प्रदेश दे मुखमंत्री उमर अब्दुल्ला होरें दिल्ली दे यशोभूमि च लोआई गोदी दकखन एशिया दी सब्भनें शा बड्डी यात्रा ते सैलसफा नमैश जिसी सैटे एग्जीबीशन दे नां कन्नै जानेआ जंदा ऐ, दौरान बोलदे होई आखी। इस प्रदर्शनी च जम्मू-कश्मीर बी हिस्सा लै करदा ऐ। इस मौके उमर अब्दुल्ला होरें आखेआ जे प्रांते दे इक कोला इक मशहूर मंदर ते धार्मिक यात्रा ते कश्मीर घाटी दी कुदरती खूबसूरती दा छलैपा सैलानिएं लेई सब्भनें शा मफीद थाहर ऐ। उनें आखेआ कि जम्मू-कश्मीर हून ना शड़ा पैहललिये चुनौतिये शा बाहर आई चुके दा ऐ, सगुआं सैलसफा ते होरनें खेत्तरें च रास-पूंजी आकर्षित करने लेई बी बधी चढ़िये कम्म करा करदा ऐ।

<><><><><><>

Chief-Election Commissioner

ज्ञानेश कुमार होरें अज्ज नमीं दिल्ली दे निर्वाचन सदन च नमें मुख निर्वाचन आयुक्त दे रूपै च कार्यभार सांभी लैता ऐ। श्री कुमार होरें राजीव कुमार हुंदे थमां एह औहद्धा सांभेआ ऐ। मुख निर्वाचन आयुक्त दा कार्यभार सांभने परैन्त संदेश च श्री कुमार होरें आखेआ जे राष्ट्र निर्माण लेई पैहली गेंह

मतदान ऐ ते भारत दे हर इक बसनीक गी मतदाता बनना चाहिद। उ'नें आखेआ जे भारत दे संविधान, चुनावी कानूनें, नियमें ते ओहदे च जारी निर्देशें मूजब, चुनांs आयोग म्हेशां मतदाताएं दे कन्ने हा, ऐ ते म्हेशां रौहग।

<><><><><><>

Delhi-IEC

भारतीय जनता पार्टी देनेता वीरेंद्र सचदेवा होरें ज्ञानेश कुमार होरें गी नमें मुख निर्वाचन आयुक्त ते विवेक जोशी होरें गी निर्वाचन आयुक्त दे तौरा पर नियुक्ति लेई बदाई दिती ऐ। इक सोशल मीडिया पोस्ट च उनें आखेआ जे भारतीय निर्वाचन आयोग च ज्ञानेश कुमार हुंदी नियुक्ति इक महत्वपूर्ण गेंs ऐ जेड़ी आयोग दी निष्पक्षता, पारदर्शिता ते लोकतांत्रिक मूल्लें गी होर मता सशक्त बनाडन। सचदेवा होरें आखेआ जे कुमार हुंदी अगुवाई च चुनां प्रक्रिया सुचारू ते निरपक्ख रूप कन्ने सम्पन्न हुंदी रौहग ते लोकतंत्र दियां जड़ां होर मजबूत होडन।

<><><><><><>

IGP-Security Review

जम्मू ज़ोन दे आईजीपी भीम सेन तूती होरें कटरा थमां बनिहाल तगर दी रेलवे सैक्शन पर सामरिक महत्व आहली थाहें दा व्यापक सुरक्षा जायजा लैता। इस मौके उप्पर उधमपुर-रियासी रेंज दे डीआईजी रईस मोहम्मद भट ते डोडा-किश्तवाड़-रामबन रेंज दे डीआईजी श्रीधर पाटिल होर बी उं'दे कन्ने हे। आईजीपी होरें कटरा, रियासी ते संगलदान आहले रेलवे स्टेशनें दा दौरा लाया ते ओह चिनाब दरेया दे उप्पर बनाए गेदे इस दुनिया दे सब्भनें शा उच्चे रेलवे पुल पर बी गे। इस मौके उप्पर उ'नें उत्थे तैनात अफसरें ते जवानें कन्ने गल्लबात कीती ते बक्ख-बक्ख एजेंसिएं आसेआ अमल च आहन्ने गेदे सुरक्षा सरबंधी हीलें दा जायजा लैता। उ'नें अधिकारिएं गी निर्देश जारी कीता जे ओह पूरी सतर्कता बरकरार रक्खन ते आपू'चै तालमेल बनाइयै कम्म करन।

<><><><><><>